

ЛҰИМА СЭРИПОС

10 октября
2019 года
№19
(1205)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

Основана 11 февраля 1989 года

Мә янытыл олнэ сәлы ошнэ мэхум
Сургут үст акван-атхатыгласыт



Ты хурит Яр, опарисц нам ошнэ ёрн щёмья, Андерс Оскал, Норвегият
олнэ саам хум, ёт лёлёгыт. Тан пуссын сәлы үрим олэгыт.
Ты овылтыт нан 4-5 лопсыт потыр ловиньтэлын.

Ты
номерт
ЛОВИНЬТЭН:

Мотыт тәл
кәсың хотпа
ловиньтаве

2

Сәлы янмалтан
мэхум акван-
атхатыгласыт

4-5

Мәньщи ләтһыл
потыртаңкв
ханищтыяңэ

7

Кёр вәрнэ ос
пувлын колыг
үнттувесыг

11

Щәнь ләтҗе
ханищтан
хум

16

Мотыт тал касың хотпа ловиньтаве

2020 тал мань таквс этпосэт Россия ма янытыл касың хотпа ловиньтаве. Ты тэла тох намайес: «Всероссийская перепись населения-2020». Ты этпос овыл хоталэт департамент общественных и внешних связей ХМАО-Югры колт ляххал тотнэ махум акван-атыглавэсыт. Овлэт Москва уст рупитан яныг кущаит ишхипың ут хосыт потыртасыт, тувыл округув янытыл пуңкотнэ махум латың лавсыт.

Россия государствен- ный статистика тэла палт пуңкотнэ хум Павел Малков лавме щирыл, мотыт тал мань мав янытыл тамле перепись китхуйпловит щес ёмты. Ты тэла «О Всероссийской переписи населения» саккон щирыл вэрыглаве. Россият олнэ мир касың лов тал акв щес ловинь- тэлаве. Юи-овыл перепись 2010 талт олыс. Ань ты лов тал сыс 40 миллион арыг йильпи матыр ёмтыс (элумхоласыт самын патсыт ос атимыг ёмтсыт, нэт-хумитакван- минаясыт ос киттыг- минаясыт, тэват мот мань вэнтлысыт).

Ма янытыл мот госу- дарстват тэнти мах- маныл ос акваг ловинь- тыяныл. Мотыт тал ООН (Организация Объеди- нённых Наций) щирыл, тамле перепись 80 элы хон мат вэраве.

Югра махум потырвос щёпитэгыт

Тувыл Валерий Михай- лович Ярлов потыртас, тав Тюменский область, ХМАО-Югра ос Ямал янытыл статистика тэла палт кущай ваңын хумыг олы:

- Ханты-Мансийский округ – Югра мат 1 мил- лион 700 сотыра ляпатем хотпа олы. Округт 16 ус, 24 савит яныг павыл (рущ щирыл лававет – посёлки городского типа), 9 район ос 155

павыл.

Округт тэва павлыт сака элынт олэгыт, тот олнэ махум мус ёхта- таңкве сака тарвитың – ты 118 павыл, 66 сотыра хотпа тот олы. Перепись тэла щёпитан махум ты павлытн тах вортур ос сукыр этпосыг порат ялэгыт, касың хотпа потре нэпакын хансы- яныл. Ос шар вэтал мат олнэ махум яныгполь этпосныл ват сэграпнал этпос мус кинсуңкве патавет. Ты тэла вэрнэ мир товлыңхапыл, ма- шинаял ос моторхапыл яласаңкве патэгыт.

Нан мань янытыл ты тэла палт губернатор нэ ваңын хотпатэ Геннадий Бухтин тав пуңкоты. Тавён сав элумхолас нётуңкве паты – ус ман павыл кущаит, кэркам хотпат, маңылат агит ос пыгыт.

Ань касың уст манос



павылт усхулыг наманыл пуссын тэра-паттавет, касың кол номер вос оныщи. Павлың манос усың хотпа мори ул вос кинсаве, олнэ колэт тэра вос хонтэве.

Мори китыглаңкве ат патавёв

Хотпа нас китыглаве, рупиты манос ханищ- тахты, рупата олн сэлы манос пенсия олнлөмт выг. Манах солкөви вуйлы, ты урыл китыг- лахтуңкве ат патэгыт. Перепись хосыт таи тэра- паттаве, ань хотпа хотыл олныл ёхтэве – рупиты манос государство пав- лыл нётумтэлаве. Мак

таи, махум хоты латңыл потыртэгыт. Руц латңыл потыртэгыт те, хот по- тыртэгыт – мирың мат манос юн ты латңаныл ос суйты. Щань латың урыл ос китыглахтэгыт.

Ты тэла хумус мины, 2020 тал ват сэграпнал этпосэт уц тэра тах паты. Потрыт аквта щес ловиньтаңкве хунь вэрмавет. 2021-2022 тэлыг сыс уц ёмашакв акван-атавет.

Перепись тэла хосыт пуссын тэра-паты – Россият манах хотпа олы, манхурип образо- вание оныщэгыт, щань латңаныл ваганыл ман ати, ювле хулытум лов тал сыс манхурип йи- льпи вэрмалит квэлта- паптувэсыт, маныр ос воссыг ат эри, ёрувляңкве патвес, тувыл манах хотпа нусаг олы манос щёлың, мот мань вэнтлум хотпат, рупитан ос ха- нищтахтын, пенсият олнэ махум. Пуссын ты овылтыт мань перепись тэла оигпан порат ваңкве тах патэв.



В. М. Ярлов ёмаспал нупыт ұныл

2020 талт ёмтнэ перепись тамле эмблемал постувес.

Светлана
РОМБАНДЕЕВА

КҮЩАИТ РҮПАТАНЫЛ

Сосса мир нъяврамыт ханищтан вярмалъ урыл

Ты этпос округ мирколт сапрани вэрыглавес. Сосса нъяврамыт маныр рупатан анъ ханищтахтэгыт, тән ты урыл потыртасыт. Ты тэла ширил рупитан кұщай хөтпат савсыр тэrvитың вярмалъ урыл анъ потыртасыт.

Ас махум латың урыл

Өвыл латың ханты мир учёный эква Евдокия Андреевна Нёмысова ханты алфавитаныл урыл лавыс. Анъ ты хотал мус ханты махум учебниканыл «Просвещение» издательстват таратаңкв ат вёрмияныл. Тән учёныяныл анъ савсыр йильпи букват номылматсыт. Ос касыңаныл таңхи, туп тав букванэ тот вос хансавет, анъ таимэгыс акван-потыртахтуңкв шар ат вёрмэгыт.

Ты урыл округ кұщай нэ Наталья Комарова Россия Президентын потыртас. Элалъ шар мак яныг кұщайт Москват ты тэrvитың вярмалъ эт рупитаңкв тах патэгыт.

Ас махум округ коныпал мөт мэтт ос өлэгыт – Ямалт, Томский област. Букваныл ёмашакв ос аквхурипаг хаснэ магыс тананылн пуссын акван-атхатыглалуңкв ос халанылт потыртахтуңкв эри. Туп ты юи-пэлт алфавитаныл Россия Министерствот образованият тах пирмайтэв ос учебникыт тонт уш таратавет.

Интернатыт лап-пантавет

Еремей Айпин анъ ос тох лавыс. Юи-өвыл тэлыт сыс Сургутский ос Нижневартовский районьгт сав школат,

интернатыт лап-пантуңкв ты патвэсыт. Тот вёрт өлнэ сосса махум тән нъяврамыт ханищтахтасыт, тән савыңпэлэ пуссын щань латңыл потыртэгыт.

Та эт сав сосса щемья сэлы ўрим ос вёраим өлэгыт. Тән нъяврамыт анъ пуссын яныг ўст манос яныг пэвлыт өлнэ интернатн тэтавет. Ты вярмалъ щемьят магыс яныг тэrvит тоты. Нъяврамыт школан тотавет, тувыл щанит-ащит тананылн сака хоса ат вэщинтыяныл. Ос агирищит-пыгрищит руш ширил өлуңкв моля ханыщувлэгыт.

Ты кұщай лавыс, анъ сосса нъяврамыт тыкос маныщи манос ханты латңын ханищтавет, ос юн ат те потыртэгыт, тән нэмхуньт щань латңаныл ваңкв ат патыяныл.

Школа астан юи-пэлт

Александр Гомзяк образование департаментыт рупиты. Тав лавыс, ты тэлныл маныщи ос ханты нъяврамыт школа астанэныл юи-пэлт «целевой прием» ширил элалъ хөт-ати ханищтахтуңкв вёрмэгыт. Тән университет манос колледжит ханищтахтуңкв те өвылтахтасыт ос тьи магыс олн ойтэгыт, округ миркол эт договор хаснэныл юи-пэлт ты олнаныл



ювле ойтавет. Ос ты специальность «региональный перечень профессий» нампа нэпакн хансым вос олы. Анъ ты нэпак ёмашакв ловиньтаңкв эри, тув мөт савсыр специальностит хасвэсыт.

2018-2019 тэлыгт 551 сосса нъяврам тамле договор хассыт, туп 96 хөтпа олнаныл ювле майвэсыт. Мөтаньт анъ иң ўрхатэгыт. Ойтум олнаныл ювле хунь мивет, ат вэганьл. Осты тэл 22 нъяврам «средний образованиян» ос 75 «высший образованиян» ханищтахтын магыс округ эт договор хассыт.

Ты кұщай лавыс: «Договор хансум аги манос пыг ханищтахтуңкв хунь пөйты, тав округун рупитаңкв ювле вос ёхты. Ат те ёхты, округ пэлыл тав магсылэ ойтым олныт пуссын ювле миңкв эрэгыт».

Школат акваг уральтавет

Сапрани акв кұщай нэ олыс, наме – Антонина Урсу-Архипова. Тав рупитан колэ тох лавэ

– служба по контролю и надзору в сфере образования. Тән округут ханищтахтын колыт акваг уральтыяныл.

Нэ анъ лавыс, Хальўс районт рупитан школат шар сав вярмалъ хөнт-вес. Тот учителит «учебный план» нампа нэпак ат хансэгыт. Төва нъяврамыт хөт тэланыл ушты төвлысыт, тән ханищтахтуңкв вуйвэсыт. Ос саккон ширил нъяврам 6 тэлэ ос 6 этпосэ ат те төвлыс, таве школан виңкв ат рөви. Ос мөт савсыр люль вярмалит тот хөнтвэсыт.

Тав мөт кұщайтн лавыс, элынт рупитан школат акваг вос уральтавет. Ханищтан хөтпат люльсаң те рупитэгыт, тонт тән нъяврамыт ос люльсаң ханищтыяныл.

Савсыр кұщайн мэтт рупитан хөтпат анъ ты сапрани пуссын потыртасыт. Тән лавыс – сосса нъяврамыт ёмашакв ханищтаңкв эрэгыт, тән пуссын номтың хөтпаг вос яныгмэгыт.

**Валентина
ХОЗУМОВА**

Салы янмалтан махум акван-атхатыгласыт

«Оленеводы мира» наппа мир-хал ассоциация Советыг рупитан хөтпат ты этпос 1-2 хөталыгт Сургут үсн ёхталасыт, тот тән китыгт щёс сапрәниһыл ылыс. Акв тамле ыыл сапрәнин салы янмалтан хөтпат ювле хулытум талт Салехард үст акван-хөнтхатыгласыт.

Ты ылы-палт 2017 талт салы янмалтан махум Швецият «Оленеводы мира» VI Конгрессаныл миннэ порат Совет вәрсыт. Ос тув сав маныл ёхталам махум халт сат хөтпа пәриясыт.

Тән танки вәрмаланыл магыс пуңк вос тотсыт ос люль тэлат хөт ылыплэгыт ке, таит тәра-паттым ём-щакв вос щёпитыһаныл ос сакконытт эрнэ латың вос хулытэгыт.

Ты мирхал ассоциацият президент хөтпаг Ямал маныл ылыс, тав ваңыг кұцаиг Эллен Инга Тури (Норвегияныл) ос Юха Магга (Финляндияныл) ылыг, тувыл ассоциацият правленияг секретарь-кұцаиг Андерс Оскал (Норвегияныл) патту-вес, ос хұрум хөтпат ассоциация правления щырыл ыс нётэгыт. Тот Михаил Погодаев

пуңкотнэ хөтпаг пәрия-вес, тавән Ингер Анита Смук, (Норвегияныл) ылыс нэ, ос Алёна Герасимова нётсыг.

Ань ты сапрәнин атхатам махум ёт Андерс Оскал ос Сергей Харючи ылыгт потыртасыг, тән элаль ылыс ёмас номт пинэг, савнув маньлат махум салы ылышунке вос тахнувыт, ыпаныл ос ащаныл пёс ылупсаныл элаль вос тотыһаныл. Тән пуссын ос мөт маныл ёхталам махум ань танки тэланьлат тара-паттысаныл ос 2021 талт VII салың мир Конгрессаныл ёмтнэ урыл потыртасыг. Тамле нак ань Ханты-Мансийск үст варае ос махум Кубок губернатора Югры наппа салыл ылыс касыл мүйлуңке тах вовавет.

Мүй махумн округ губернатор кетум латҗе Александр Комиссаровн



ловиньтавес, тав ман округ мирколуvt ма-вит ургалан департаментыг кұцай ваңын хумыг ылы. Наталья Комарова мирхал Конгрессын ёмщакв щёпитахтын урыл латың лавыс, тувыл салы үрнэ вәрмалит ёр номт ылыснэ хөтпатн эрнэ щырыл йильпииг вос варавет.

Хантыг, маньщит ос ёрныт - тән йис тагыл салы ылыснэ махум. Ань ты ылупсаныл ул вос ёрувлыһаныл, тән правительство палыл олныл нётавет, хөт-ати ишхипың утыл вәрвёсыт, тамле вәрүм проектаньлат «IT-стойбище» лававе. Тот ылыснэ хөтпат «Госуслуги» порталн пуссын хасвёсыт ос танки

пусмалтахтын колыт ёт, нывраманыл ханиш-тахтын колыт ёт связь тох ылыснэгыт.

2021 тал ылылтахтын мус 23 «IT-стойбище» щёпитэгыт ос тот 2 сөтыра элумхөлас ишхипың утыл ылуңке патэгыт. Ты коньпал вөрт ылыснэ махум 101 мананыл ыс акв тамле утыл варавет.

Тувыл касың маньлат ёхталам кұцаит танки рупатаныл ылылтыт китыглавёсыт. Ма янытыл лов хон матт салы янмалтавет, Россияг сав-сыр мирыт салы ыс ылыснэгыт. Ань тувыл ёхталам мүй хөтпат пуссын потраньлат хунт-лувёсыт - тыи Чукотка, Камчатка, Сахалин, Тай-





мыр, Ямал, Амурский, Магаданский ос Архангельский областит, Забайкальский ос Хабаровский крайиг, Бурятия, Саха Якутия, Тыва ос Коми республиканыл. Тувыл элы мот хон маныл Исландия, Норвегия, Швеция, Финляндия ос Монголияныл ёхталам хотпат танки вэрмалыныл урыл потыртасыт.

Тан ань пуссын аквхурип тарвитың вэрмалы оньщегыт, салыяныл мощцаг ёмтэгыт. Ыйхуланыл салы пурнэ уйтн, тұлмахытн, ялпың уйтн акваг новавет. Тувыл тованакт олнэ мананыл

ыныг витн амаравет, мот щес найн тэвет.

Тамле вэрмалит илттыг ёмтнэныл порат салы ўрнэ щемьят танки ёранылт нэматыр вэруңкве ат вэрмэгыт. Ыйхуланыл тот та порсэгыт. Ань тэланыл урыл хултнэ магыс ёмас ищхипың утыл вэруңкве ты эрегыт, ос танкинаныл ўргалан магыс писаль оньщункве вос тартвэсыт.

Това тэпың мат матыр люль утыл паргалтавет, ты паттыг салы тэпыт хот-сакэгыт. Салың махум танки халанылт вайхатым вос олэгыт ос

акван вос нётхатэгыт. Ыйхуланыл агмының ёмтнэныл порат агманыл тара вос хонтыяныл ос моляхнув пусмалтаңкве вос вэрмысаныл.

Салы ошнэ махум лавнэныл щирыл «О северном оленеводстве» намба российский саккон мощ мот щирыл хансуңкве эри. Тан салыт савсыр матт янмалтыяныл, тувыл тэп мананыл ос ати аквхурипат. Товат ворт манос тунра мат янмалтавет, мотаныт нёрың мат ўравет. Ты тэлат пуссын мұсхалыг ханищтаңкве эрегыт ос янас латңыл вос хұлтавет.

Мот хон маныл ёхталам хотпат ос потыртасыт. Тан олнэ манылт кёрлэх пинаве, ты ос ёмас хунь, салыяныл порсэгыт, машина хоявет, сакватавет, тұлмахытн ос юсвойит сака новавет. Тувыл ма-витаныл овлэт малтыпыг ос ётыл ащирмаңыг ёмтапи, салыт ос савалэгыт, тэп ворил ты нох-хилыяныл. Маньлат махманыл салы янмалтаңкве таңхэгыт кос ос салыт савмуңкве ат ке патэгыт, тан ты вэрмалитыл хұрахлэгыт.

Ос сапрāнит Ямал маныл ёхталам маньлат аги Екатерина Яр потыртас, ань салы ошнэ мат

олнэ агит ос пыгыт ватихал тыг ос вос вобиньталавет, матыр номтың тэлан вос ханищтавет. Тан вос вагыт ос вос сунсэгыт, салы ўрим сав мирыт олнэныл.

Тувыл потыртаманыл юи-палт ассоциация Совет правлениян акв йильпи хотпа пэриявес. Ты тал Михаил Погодаев Саха Якутият министерство колн рұпитаңкве воввес, таимагыс тав ты правленият пуңк-тотуңкве ат вэрми. Ань тав пентсылэ ты рұпата Ингер Анита Смурк элалы тотытэ, Алёна Герасимова тавен нёты ос сатыт хотпагыт Советн Степан Кецимов пэриявес. Тав ман округут салы янмалтан тэлат палт матахмат тал рұпитас.

Михаил Погодаев вэрм рұпататэ магыс пұмаципа латңыл лаввес ос мүйлупсал майвес. Тав ювле ос потыртас, лов тал салы янмалтан хотпат ёт журтыңыщ рұпитас, тан савсыр эрнэ нэпакыт хассыт, тарвит тэлат ёмщакв щёпитасаныл. Салың махум тэланыл пуссын ёмасыг вос ёмтэгыт, тав ты овылтыт акваг номсахтуңкве паты.

Тамара МЕРОВА



ЛЯХХАЛЫТ

Пенсиян иң ат миннэ хөтпат нётавет

Нёмхот ат рупитан махманув, хотьютн акв-кит тал пенсия-олн винэ мус хультыс, ань элаль ханищтахтуңке вёрмёгыт. Касащан хөтпат нётуңке тах патавет. Ань тыммагыс федеральный ос округ бюджетный олн таставе.

Өвлэт нанан «центр занятости» наппа колн заявление-нэпак хаснэ магыс ялуңкв эри. Тувыл хөт ханищтахтасын ке, та диплом-нэпак ёт-вуелын. Рупитан нэпак, трудовой книжка, щёпитэлён. Рупата кущаин нан урынтыл нэпак вос хансы, ты нэпак руц латңыл тох лававе – «гарантийное письмо». Агмыңмосың хөтпаг ке олэгын, ос эрнэ нэпак ёт-вуен.

Ты ханищтап туп хурум этпос мины. Овыл щёс ханищтахтын хөтпа

магыс 68 сөтыра 500 солкөви ойтаве. Ханищтахтап миннэ сыс нан сатхуйплов сөтыра савиткем солкөви стипендия-олныл ойтункве патавен.

Ань нан магсылын тамле ёмас вёрмалит щёпитавёсыт:

– саккон щирыл лёкарытн олн ойттал уральтавен;

– стипендия-олныл ойтавен;

– олнэ маңыл ханищтахтын мус тыгле-тувле яласан лёнхын магыс олныл мивен. Нәиң-

туйтыл, нәиңхәпыл, то-влыңхәпыл миннэ магыс тынтәлнув билет ёвтуңкв эри. Автобусыл ос минуңке рөви. Хөтал сыс нан тәнут ёвтнэ магыс хурумса́т солкөвил ойтавен;

– олнэ кол магыс ойтхатнэ олныл ос таставен, атсат атпан солкөвил мивен;

– ты ханищтап ёмщакв а́сланын юи-пәлт эрнэ нэпакыл мивен;

– рупатан ёмщакв ванән магыс тара рупата тах хөнтэгын, элаль номт тотункве патэгын.

Ты вёрмалы щирыл ханищтахтуңке рөви:

– нан диплом-нэпак ат ке оныщегын;

– киты рупатан ханищтахтуңке касасчегын ке;

– ос о́щнэ профессия щирыл савнув ваңкв патэгын, элаль ханищ-

тахтуңке номылма-тэгын ке.

Касащан хөтпат магыс ищхипың ут хосыт ханищтахтын вёрмалы ос щёпитавес. Тән юн ун-лым ищхипың ут хосыт ханищтахтуңке ос вёрмёгыт.

Ты тәлат нан «Ханты-Мансийск үс центр занятости» колт тара-паттуңке вёрмегын, тув хултнэ латың кетән.

Ты кол адресэ: Ханты-Мансийск үс, Карла Маркса үсхулы 12 колэ, телефонэ:

8(3467) 32-05-03, свонитан порат тув 11 нётумтән; тел./факс: 8(3467) 37-53-51.

«Ханты-Мансийск үс центр занятости» колныл кетым потыр маңыщи латңыг Николай МЕРОВ хансыстэ

Нөх-патум хөтпа наме лаввес

Ханты-Мансийск үст яныг касыл олыс – «Кубок мира по шахматам 2019». Тыг сав маңыл 128 намыңсуиң шахматистыт касуңкве ёхтала-сыт. Этпостем кассыт, сукур этпос 9 хөталёт овылтахтасыт, маңы таквс этпос 4 хөталэ мус кассыт.

Тынакт Азербайджан маңыл ёхталам хум Теймур Раджабов тав нөх-патыс. Касыл юи-овыл хөталанёт ты хум ос Китай маңыл олум хум Дин Лижэнь хулытсыг, халэнт нила хөтал кассыг.

Овыл хөтал нэмхотьютән нөх ат патыс. Ётыл Дин Лижэнь ёрнуве олыс. Хурмит щёс Теймур Раджабов нөх-патыс. Тувыл юи-овыл хөталт, маңы таквс этпос 4 щислатэт, ты ма́к ёр хөтпаг магыс тай-брейк наппа касыл вәрвес. Тот Теймур Раджабов тав та ма́к ёр олыс.

Ты кит хумыг ань

турнир претендентов касылн ялуңкве вёрмёг. Та ма́т нөх-патнэ хөтпа Норвегияныл олнэ чемпион мира Магнус Карлсен ёт касуңкве паты. Ты яныг касыл 2020 тәлт туйг Екатеринбург үст ёмты. Щар ма́к ёр хөтпа чемпион мира намыл миве.

Ань нөх-патум хум 110 сөтыра доллар олныл миве (рубль олныл лови-ньтаңкве те – ты 7 миллион 150 сөтыра савит солкөви). Теймур Раджабов тох лавыс: «Касыл щёпитама ма́хум тәланыл мусхал щирыл вәрсаныл, тананылн пумащипа



Ищхипың ма́т вим хури

ла́тың лавёгум. Элаль турнир претендентов ма́т касуңкве патэгум, тот сака ёр хөтпат халанылт пёрщегыт. Тән ётаныл аман тай вёритэгум, ат ва́глум. Китай ма́ныл ёхталам хум Дин Лижэнь ёмашакв ёнгасас кос, ос ётыл, сунсэгум, ва́гтал патыс. Ханты-Мансийск үст касуңкве сака ёмас,

тыт сымың ма́хум олэ-гыт».

Ма́н үсувт тамле касыл ань атыт щёс ты олыс. Ты элы-пәлт 2005, 2007, 2009 ос 2011 тәлыт порат вәрыглавес. 2020 тәлт Ханты-Мансийскыт 44 шахматный олимпиада вәраве.

Светлана МАТВЕЕВА

ХАНИЩАП

Мāныщи лāтңыл потыртаңкв ханищтыянэ



Ты этпос 5 хōталэт нйврамыт ханищтан хōтпат янытлан хōтал олыс. Ты кастыл ам мāныщи нэ Альбина Митрофановна Кулешова, такви опарищ наме Сайнахова, урыл потыр хансэгум.

Тав нйврамыт ханищтан нэг сав тал рупиты. Такви рупататэ урыл тав тох потыртас:

«Ам Хальүс район Кульпас школат 17 тал рупитэгум, ань нйврамыт магсыл «Югорики» наппа кружок вāрсум, тāнаныл юнхатуңкве ханищтыяnum. Ань тув 5-6 агит акваг ёхталэгыт. Вāрум, юнтум пормасанув школат олыглан выставкат, ялпың хōталыт суссылтыяnum. Ты коньпал садикт рупитэгум, мāнь нйврамыт мāныщи лāтңыл потыртаңкве ос ханищтыяnum.

Учителиг ам Ханты-Мансийск үст Югорский

университетт ханищтахтасум. Диплом-нэпакумт хансым олы - «учитель мансийского языка и литературы». Ты элы-пāлт ос юнхатнэ нэг Горно-Алтайск үсн ханищтахтуңкве ялсум. Тōнт āям увщитэ Анастасия Ильинична Сайнахова тот рупитас. Тувыл Анастасия Ильинична Ханты-Мансийск үсн вāнтлас ос сав тал Югорский университетт мāньлат хōтпат ханищтым рупитас. Аквам мир вāнэ хōтпаг олыс. Тав мāныщи мир магсыл сав эрнэ тэла тоыт, мāныщи лāтың ханищтан нэпакыт хансыс.

Кульпас школат сав тал мāныщи лāтңыл нйврамыт Евдокия Ивановна Кутина ханищтыянэ. Ань āгирищит-пыгрищит туп урокыт юи-пāлт щāнь лāтңыл потыртаңкве вōвыглавет».

Альбина Митрофановна увщитэ Ольга Митрофановна Тимусева 40 арыгкем тал Кульпас школат рупиты, нйврамыт руш лāтңыл ос литературан ханищтыянэ. Альбина Митрофановна āгияге Юля ос Оля Ханты-Мансийск үст щēmьяң тāгыл олэг ос нйврамыт ёт рупитэг. Тән сас Ханты-Мансийск үст ханищтахтасыг, Юля Югорский университет асталас, Оля педучилищат ханищтахтас. Яныг āгитэ Юля савалап нйврамыт колт воспитателиг ат тал рупиты. Мāнь āгитэ Оля садикт нйврамыт ўргалан нэг рупиты.

Альбина Митрофановна мāныщи пēs йис вāрмалитыл мāньтāгыл пұмщалахты. Ты урыл тав лāвыс: «Ам школан амки хунь ялантасум, мāнав Ульяна Филипповна Москвина мāныщи йиквыт йиквункв, эргункве ос мāныщи пормасыт

юнтуңкве ханищтасанэ.

Ань мēн Татьяна Абрамовна Качанова ёт ансамбль вāрсумēн ос «Юрт нэг» намтысламēн. Ты туи вōртур этпос Ягрим пāвылт ялпың хōтал олыс, савсыр районытныл мāхум мāньхāпыл касуңкве тув ёхталасыт. Мēн Татьяна Абрамовна ёт тув эргункве ялсумēн. Мēн тай сака щāгтсумēн, матъёмас ат ёрувлaвемēн ос мāныщи лāтңыл эргункве вōвыглавемēн.

Кульпаст тамле ялпың хōталыт сака ат вāрыглавет. Мāнавн савсыр ханищтапн вāтихал ос вōвыгласаныл ке, тōнт тай ёмаснувэг олыс. Пāвлув олнэ нэт акваг аква-атхатыглэгыт, эргункве ос йиквункве, юнхатуңкве халанылт ханищтахтэгыт, ам тув ос акваг ялантэгум.

Ам Альбина Митрофановна, увщитэ Ольга Митрофановна ос тән āгиянэ нйврамыт ханищтан хōтпат янытлан хōталыл янытлыяnum, сав ёмас, сымың лāтың кетэгум. Пус кат, пус лāгыл тāнанылн лāвэгум.

Людмила ТЕТКИНА



ХАНИЩАП

Тав номтэ тэлаг ёмтыс

Касың аги ман пыг школа астанэтэ
Элы-палт хотты номтыл олы.

Тувыл ты номтэ тэлаг ёмтнэ мус
элалх хот ханищтахты ос рүпитаңкве
патхаты. Аквта щирыл хуньт Сургут үст
Настя Порозова агирищ яныгмас, ань
тав овылтыт рүтанэ потыртасыт.

Оматэ Ольга Порозова
лэвыс: «Настя агим
Сургут уст №26 школа
2015 талт асталас. Сартын
оыыл классыт тав ётэ ха-
нищтахтын агиришит-
пыгришит №39 школан
ялантасыт, ань та пёс
кол атим, ётыл пуссын
тав ляпатэт үнттым №26
школа ханищтахтуңкве
патсыт.


Настя манытагыл эр-
гуңкве таңхыс, ам таве
музыкальный школан
ос тотыгласлум, тыитэ
ос та школатэ аквторыг
астанысаге.

Тав ныврамыт ёт ён-
гуңкве манос матыр
варуңкве ёмщакв хасы.
Аквёет ёнгын юртанэ
матарыл акваг пүмща-
ласанэ, тувыл тан тав
лате хунтлым олсыт.
Ул таимэгыс Настя
ныврамыт ёт рүпитаң-
кве тахмаяс. Тувыл
Сургутский универ-
ситетт мань ныврамыт

ханищтан хотпаг элалх
ханищтахтуңкве патыс.
Ты тал тав университет
астанас ос такви ялум
школатн рүпитаңкве
вөввес.

Анастасия Алексан-
дровна тот ныврамыт «Е»
оыыл классыт ханищ-
таңкве патсанэ. Тав ань
туп акв этпос рүпитас,
ос варнэ тэланэ тавён
сака мүстэгыт. Агиришит
ос пыгришит тав ляпатэн
акван-атхатэгыт, матыр
китыглахтэгыт. Агим
лэвме щирыл, тан латың
хунтлын ныврамаквет.
Тувыл Настя аквёет
рүпитан махманэн ос
нётаве, таимэгыс ам
номтум сака ёмас».

Анастасия Порозова
школа рүпитанэтэ
кыныпал Сургутский
университетт магистрату-
рат элалх ханищтах-
туңкве патыс. Тот тав
педагог-психолог хотпаг
емты тах. Тувыл маньлат



хотпат магыс савсыр
ханищтапыт ман мастер-
классыт ёмталан порат
тув яланты.

Настя овылтыт анёк-
ватэ Зоя Валентиновна
Пахомова, Владимир Пе-
трович Мирошниченко
ащойкатэ потыртасыг.
Тэн апыгкетэн тэланэ
магыс щэгтым олэг, вос
ёмщакв рүпиты, нэмат
люль накыт ул вос ём-
талэгыт.

Зоя Валентиновна
лэвыс: «Настя маниг
олмёт ам маньщи лат-
ңыл потыртаңкве
мощ ханищталыслум,
тав «Сёвыркве» ос
«Сёрипос» эргыг сака
ёмщакв эргысаге. Юван
Шесталов хансум стихо-
творениянэ ваганэ ос
ловиньтасанэ. Мён
аквёет үст сасса махум
ялпың хоталыт олнэ
порат эрыг эргысламён
ос мот маньщи нёт ёт
йиквыт йиквсумён.

Тувыл хотталх үш-
лахтын ман яласаммён
порат, хотты санаторий-
колт мён тот ос ты эр-
ганув, йикванув суссыл-
тасанмён. Ань та порав
пүмыщ номылматыг-
лаңкве олы».

Настя оматэ Ольга
Владимировна пүль-

ницат рүпиты, тав мань
лёккарыг олы. Молты
талт тав «Заслуженный
работник» нампa ма-
гылт ошнэ пёсыл мүй-
луптавес. Настя мань-
тагыл ащтал хультыс,
тав оматэн ос анёкватэн,
ащойкатэн нётым ян-
малтавес.

Зоя Валентиновна,
такви аги опарищ наме
Хозумова, маньлат
агииг олмёт Хорың-
павылныл Сургут үсн
ханищтахтуңкве ёхтыс
ос тувыл сав тал кол
үнттын мат рүпитас.
Хунь үст сав йильпи
колыт үнттувёсыт, тав
тот штукатур-малярыг
олыс ос ань пенсиян
минас. Владимир Петро-
вич сав тал машинал
яласым рүпиты. Тамле
ёмас щёмыят Настя
яныгмас. Тан пуссын пу-
стагыл вос олэгыт, сав
шунь, сав сёт тананылн
лэвэгум.

Ман Анастасия Алек-
сандровна ханищтан
хотпат ялпың хоталыл
янытлылүв, олупсатэ
посыңыг вос олы, ном-
танэ тэлаг вос ёмтэгыт,
пус кат, пус лагыл.



Настя анёкватэ ос ащойкатэ ёт

Тамара МЕРОВА

СОССА МИР КУЛЬТУРА

Хорамың пормасыт юнтсыт



Юнсахатым унлахолэгыт



Лопмуст мүйлүм мир

Туи порат Хальбс район Лопмус павылт «Шешкинские чтения» маныщи латың ханищтан тэла олыс. Тув маныщи эква Мария Владимировна Ситникова аги агитэ Татьяна ёт ёхталас. Лопмуст олме порат тав такви олупсатэ урыл мощ потыртас.

Сартын ты ханищтап Лопмус павылт вати-хал щёпиталвес. Тувыл матахмат тал ат вэрыглавес, ань ос нох-вормалтавес. Пёс порат тот Петр Шешкин мащтыр ойка олыс. Ты маныщи хум пёс потрыт, мойтыт ос амщит атыс, касал савсыр пормасыт ёргуңкве сака хасыс. Ань тав тэлатэ элаль тотнэ щирыл ханищтап ты вэрыглавес.

Лопмусн туи порат сав маныщи хотпа ёхталас. Яныг хотпат, няврамыт маныщи латңыл

потыртаңкве ханищтахтасыт ос савсыр пормасыт катыл вэрыс.

Мария Владимировна тот махум пормасыт юнтуңкве ос сакныл хорамыт хартуңкве ханищтасанэ. Ты мащтыр нэ 2001 талт «Пёс Сургут» наппа музеиң мән рүпитанкве патхатас. Тот савсыр нётнэ пормас вэрыс ос маныщи супыт юнтыс. Такви рүпитанэ савсыр матт суссылтасанэ.

Округувт сосса махум халт савсыр касылыт олыглам порат, тав акваг тув ялантэлыс, сав щёс

нох-патыглас. Тыимэгыс мүйлупсал акваг мүйлупталвес ос янытлан нэпакытыл майлуwes. Ань ты рүпатаныл пөхын минас, пенсия-олн вуим олы.

Такви магсылэ сэтапныл нётнэ шулкиныт саги, маныщи супыт, тёрсахит юнты. Ты пормасанэ ялпың хоталыт олнэ порат акваг н о х - м а с ы г л ы н э. Хорамың тучаң вэрыс, тавеялнэ-миннэлёңхыт акваг ёт-тотыглытэ. Ты коньпал ос мот сав ёрнэ пормасыт оныщи.

Оматэ наме Анисья Тимофеевна Мойбуrowa, Олттумп павыл нэ, олыс. Мэрия тот ты самын патыс. Аще руш ойка олыс. Мэнь порат аги анёкватэ палт яныгмас. Тот ты маныщи латңыл ёмщакв потыртаңкве ханыщувлас.

Анъя павыл школа асталме юи-палт, элаль Ханты-Мансийск ўс медицинский училищан лаборантыг ханищтахтуңкве минас. Тувыл савсыр павылтт мэнь лёккарыг рүпитас.

Мария Владимировна «Пёс Сургут» наппа сосса мир олупса элаль тотнэ мат рүпитама порат, 2012 талт «Народный мастер России» намыл

майвес.

Агитэ аги Татьяна Сургут ўс училищат ань ханищтахты. Таве ос маныщи латңыл потыртаңкве ханищтытэ. Сосса мир семинарытн манос ханищтапытн акваг ёт вөвыглытэ.

Татьяна ты урыл лавыс: «Анум тамле вэрмалъ сака пумащ. Маныщи мир пёс олупса ханищтаңкве сака мусты. Пормасыт ёрнэ щирыл юнтуңкве анёквамн ханищтавем, хултавем. Тав анумен акваг нёты. Маныщи латңыл потыртаңкве лашал ханищтахтэгумен, това латңыт ань вэганум».

Мария Владимировна Лопмус павылт махум тучаңыт, нуйил хурыгсовыт ос мот пормасыт юнтуңкве, хорамыт хартуңкве ханищтасанэ. Павлың махум щэгтым тув ёхталасыт. Апыгрище ос касың хотал тав пөхат унлым юнсахатас. Матыр ат тэлыс, анёкватэн хултыглавес.

Мотынтыг Петр Шешкин самын патме пасныл онтырсат талэ товлы тах. Ты кастыл тэн Лопмусн ялуңкве ос лавхатсыг. Нән, махумаквет, ос тув ёхталэн.

Николай МЕРОВ



Т. Тихонова ос О. Рыжкова

КАСНЭ ВАРМАЛЬ

Аги касуңкве хасы

Виктория Отшамова Хальүс район Тэк павыл-ныл олы. Ань Ягрим павылт колледжит китыт курсыт мань лёккарыг ханищтахты. Ты тал Виктория 16 талэ төвлыс. Ягрим павылт тав хұрум тал ханищтахтуңкве тах паты. Ты юи-палт Ханты-Мансийск үсн элалы мины ос яныг лёккарыг ханищтахтуңкве номсы.

Тав щаняге-ащаге Тэк павылт олэг. Омагэ Марина Ивановна Нетина «Совыркве» намба садик-колт няврам ўргалан нэг сав тал рупиты. Атягэ Эдуард Алексеевич Отшамов хұл алыщлы ос вораи.

Туи порат Виктория павлың махманэ эт

Ягримн маньхапыл касуңкве ялыс. Ты урыл аги лавыс:

– Ам хұрмит щёс тамле касылн ёхтысум. Ойттур этпост Нефтеюганский район «Сказка» намба ўшлахтын мат маньхапыл кассум. Тув ам Хальүс районт олнэ хөтпат ёт ялсум. Тот махум ханты хапыл товсыт, Ягримт ос маньщи маньхапыл махум кассыт.

Анумн ханты хапыл товуңкве мощ кұпнит-нугег олыс. Молты тал ам павлың махманум ёт Восыңтұр павылн вовыглавёсум. Ань маньхапыл касуңкве ам ёмашакв хасёгум. Касыл элы-палт руш хапыл (байдаркал) товуңкве



В. Отшамова

ханищтахтасум.

Тэк павлувт олнэ мир тамле маньхап ат оныщёгыт, Ас яв сака павхың, яныг моторхапыл яласаңкве

туп рөви. Ам маньхапыл товуңкве хасёгум, тыи-магсыл касуңкве хуңь вовыглавем, тара щёпитахтёгум.

Людмила ТЕТКИНА

Маньлат хум маньхапыл товыс

Вячеслав Чупров ёт ам Хальүс район Ягрим павылт вёртур этпос вайхатасум. Тонт савсыр районутт олнэ махум маньхапыл товуңкве тот атхатыгласыт. Вячеслав маньхапыл касуңкве сака ёмашакв хасы.



В. Чупров

Тав Ягрим павыл команда магсыл касыс, ты махмыт ёт нөх-патыс ос овыл места вис. Ам маньлат хум китыгласум, маньхапыл касуңкве хөт ханищтахтас, ты урыл Вячеслав тох потыртас:

– Ам Лёпмус маньщи павылт яныгмасум, маньхапыл товуңкве маньтагыл ханищтахтасум. Тот олнэ махум ты хапыл пуссын яласаңкве хасёгыт. Ам мөт пыгрищит ёт хұлпыт сунсуңкве, вораыңкве акваг ялсум. Тонт павлың махум маньхап пуссын ошсыт, ань моторхапыл пуссын яласёгыт.

Маниг олмум порат щанягум-ащагум ёт Лёпмус павылт олсум. Омам маньщи нэ, тав наме Татьяна Савельевна Хозумова, атям Виктор Петрович Чупров – саран хум. Ань тән Кульпас павылн вантлысыг, тот олэг.

Омам маньщи латңыл потыртаңкве хасы. Ам маньтагыл щань латнум хұлыслум, ёмашакв торгамтёгум, потыртаңкве сака ат хасёгум, аква-кит латың туп лавуңкве вөрмёгум.

Ань тыг сав маньлат хөтпат ёхтысыт, тән пуссын маньхапыл молях товёгыт. Ты махум халт нөх-патнэ магсыл сака сав ёр пинуңкве эри. Касыл элы-палт ам маньхапыл акваг яласасум.

Молты тал ам Восыңтұр павылн касуңкве ялсум. Та порат ам щанягум-ащагум ёт Кульпаст олсум, та павылныл ёхтум команда ёт кассум. Рупата кинсым Ягримн вантлысум, тувыл рупата тыт ос сака атим, ань хұл алыщлым яласёгум.

Тамле каркам маньлат хум Ягрим павылт олы. Ам тавен паща латың кетёгум. Аквта щирыл элалы маньхапыл касуңкве вос яланты ос овыл места акваг вос выг. Ёмас рупата вос хонты, сотыңыщ ос щуниңыщ элалы вос олы.

Людмила АЛГАДЬЕВА

Кёр вәрнэ ос пувлын колыг үнттувесыг

Элнаң, 15-16 нотт, мәнъщи ос ханты махманув кёр вәрнэ колыг (кузница) ошсыт. Ты урыл «Төрүм Маа» музейт рүпитан ханты хум Вячеслав Кондин потыртас. Пувлын колыг ос ошсыт, руш щирыл «Баня по-чёрному» лававе. Хот тамле колыг үнттыглавёсыт, ты овылтыт хонтаң мәнъщи хум Анатолий Брусницин тав вәгтэ.

Ювле хультум этпост «Төрүм Маа» музейт «Традиции в ремёслах – основа для этноса» нампa семинар олыс. Та хоталытт сосса махум – Вячеслав ос Михаил Кондиныг, Анатолий Брусницин ос Павел Тользин кёр вәрнэ кол ос пувлын кол үнттысыт.

Ханты хум, округ Дума депутат **Александр Новыхов** лавыс: «Таи ёмас, ты проект щирыл мәнти махманув рүпитэгыт. Музейт рүпитан ос павылт олнэ хотпанув колыг үнттуңкве хасэгыт. Тан пуссын мащтыр, кәркам махум. Ват талтем үрхатасув, музейт аман хунь йильпи колыг үнттавет. Ань махум тыг ёхтэгыт, пүмшалахтуңкве патэгыт, колыт татем мащтырыг хотьютн үнттувёсыт. Мән щагтым лавёв, ты мәнъщи ос ханты махманув тән тох хасэгыт, тән үнттысыт.

Тамле семинарыт порат, касың тэла ёмшакв ёл-хансаве, ханищтаве, кинан пославе.

Ты щирыл мән пёс йис тэланув нөх-вөрмалтыянув, ань яныгман хотпатн вәңкве патавет, ат ёрувлавет».

Кёр вәрнэ кол

Вячеслав Кондин музейт савсыр программат ос проектыт палт пуңктоты, хум тох потыртас: «Культура кол палыл мән грантолын майвёсүв, ань таимәгыс кёр вәрнэ кол ос пувлын кол үнттуңкве вуйхатасүв. Нoryт мәнти щёпитасанув, тыг тотсанув. Кёр вәрнэ кол округ янытыл воссыг нәмхот атим. Ты кол мён Михаил ашчим ёт үнттысламён, Дмитрий Плотниковн нётвесамен. Колканэ сёил тотыслув, най ёл те паты, нөх ул вос пёламлаве. Кёр вәрнэ «горн» нампa күр варсув – яныг ахвтасытыл пүврыг пиныслув. Пёс порат кёр вәрнэ хотпа сака янытлавес, тав матыр-ати пуссын щёпитас, исум кёр ёт рүпитаңкве хасыс. Мот сәмт щёвал



Кёр вәрнэ кол



П. Тользин, А. Брусницин, В. Кондин, Д. Плотников ос М. Кондин

түштэв, мән пасан вәрёв.

Хунь колув асты, ныврамыт ёт эрнэ матыр вәруңкве патэв – исум кёр рәтуңкве, рәктныл вәрнэ аны-саныт ос мот матарыт исылтаңкве патэв».

Пувлын кол

Пувлын кол музейт научный сотрудникиг рүпитан хум Анатолий Брусницин ос Касум павылныл ёхталам ханты хум Павел Тользин тән үнттыстән.

Анатолий Николаевич лавыс: «Опам потырталыс, хонтаң мәнъщи-янув пувлын коланыл күр ат ошсыт. Хунь рушит ёхтысыт, күрың пувлын колыг үнттуңкве уш патвёсыт. Музейн ёхталан махум акваг китыглахтэгыт: сосса махум пёс порат хот ловтхатасыт, аман сөль ловтхатыгласыт? Ювле лавёв, атхунь

ловтхатасыт. Ань тай пувлын кол оныщёв, мүй мир вәңкве патэгыт, махманув тамле колт ты ловтхатасыт, пувлысыт.

Пёс порат мән мавн Эстонияныл учёный махум ёхталасыт, олнэ коланув ос пувлын коланув нэпакн послыгламаныл. Та хурит мән сунсыгласанув, тувыл та щирыл ты колув үнттыслув. Хүрум хури суссув, кит пувлын кол Тугияны ханты павылт послувесыг, акв хури – Сүкыръя мәнъщи павылт».


Я-ты, ань тамле эрнэ колыг «Төрүм Маа» музейт та үнттувесыг. Тот рүпитан ос мүй махум мащтыр хотпатын сав ёмас, сымың латың лавсыт, ёмас номтыл ёмыгтасыт, пүмшалахтасыт.

Светлана
РОМБАНДЕЕВА



Пувлын кол үнттэг

Омам холът щаквщегум



Г. М. Курганова ос ханты агирищ

Хальүс район Тэк павылт пёс тагыл
маштыр махум олэгыт, катыл матыр-
ати воруңке пуссын хасэгыт. Хум хотпат
сунит, маньхапыт, алыщлапыт вэрэгыт, нэт
– апат ос савсыр анысаныт маштырлэгыт,
маснут юнтэгыт, сакныл сыре-сыр пормас
хартэгыт, сэтапыл хорамың шулкиныт
сагэгыт.

Тан халанылт акв сака
маштыр нэ олы – Галина
Михайловна Курганова.
Таве туг Ягримт васлум,
тот нэт пёс щирыл тур-
лопс хартуңке ханищ-
тахтасыт. Ётылнуве,
лүпта этпост, тав Ханты-
Мансийск үсн ёхталас,
тыт апа вэрнэ махум халт
щаквщис.

Галина Михайловна
олупсатэ урыл ки-
тыгласлум, матыр-ати
катыл воруңке хот
ханищтахтас. Нэ тох
потыргас:

– Омам маштыр нэ
олыс, янгыщ совныл
матыр-ати юнтыс. Сү-
мъяхувт тав вэрыглам
сахиянэ ань тыхотал мус
олэгыт. Сакныл турлопс
ос пальсак хартыс. Ханты
супыт юнтыс, павкпалыл
варсанэ. Яныг увшим,
Татьянам, супыт ос акваг
юнты. Маньтагыл номилум,
омам сас халыптыс,
тувыл хансат шуртыс.
Ам ань ос тав холътэ сас-
ныл савсыр хусапсовыт
щёпитэгум, ты тэлам
сака эруптылум. Хунь
апа вэрнэ семинарн вов-
вёсум, ам татем щэгтсум.
Тыт ань ам ётум лов-

апат вэрыгласув. Тамле
яныг апа юнтуңке
хосаттагыл кос тахсум.

**– Галина Михайловна,
наң хот яныгмасын?**

– Тэк павылт 1947
тэлт самын патсум,
тот яныгмасум. Овил
классыт павлумт ханищ-
тахтасум, элалы Хальүст
ханищтахтасум. Тувыл
Миасс үсн минасум, тот
геологоразведочный тех-
никум асласум, 1970
тэлт. Техник-геофизик
намп диплом-нэпакыл
маивёсум. Та порат Союз
олыс, ам Узбекистан ман
рүпитаңке кетвёсум.
Экспедиция колув Таш-
кент үст үнлыс. Кызыл-
кум ос Каракум пустыняг
янытыл яласасүв, нёрт
рүпитасүв.

Тот хум вэрсум, ойка-
мэныт олнэ колыл май-
весамён. Китпыг оныщиг-
ласмён, яныг пыгмён иң
маниг олме порат хотталы
щалтыс. Ташкент үст ват
нупыл ат тэл олсум. Хунь
Союз лакква-патыс, мён
пыгум ёт амти мамн
йисмён, 1994 тэлт.

Тэк школат география

ханищтым сав тэл рүпи-
тасум, тувыл пенсиян
минасум. Пыгум наме
Дмитрий, институт аслас.
Ань ос Тэк павыл
школат рүпиты. Кол-
тагылыгы ёмтыс, эква-
тэнтэлаги-пыгянмалтэг.
Ксюша агитэн «**Ас ай
ёх**» (Дети Малой Оби)
ханты ансамбли эрги.
Ярослав ос Владислав
юрт ныврамагён атыт
классыт ханищтахтэг.

Ам атям Михаил
Андреевич Но-
вяхов яныг хонтын
ялыс, Ленинград үс
ляпат сакватавес, юв
ёхтыс. Омам Екатерина
Семёновна, аги опарищ
наме Рябчикова олыс.
Тэн нёлолов ныврам
яналтасыг.

Опам Андрей Семё-
нович нила пыганэ ос
кит агияге тактёт ян-
малтасанэ. Нывраманэн
иң манит олсыт, щашё-
квам хотталы щалтыс.
Нила пыг пуссын хонт-
луңке вуйвёсыт, туп
алям юв ёхтыс. Тот хот
госпиталыт операциял
вэревес, акв лаглэ атим
олыс, кёр протезыл
щёпитавес. Хунь юв
ёхтыс, йивныл күпнит
протез маштырлас, та
мат тарвитың кёр утэ
арытаптыстэ.

Алям Ый йиквнэ эрыг
сав вас, тугыглап порат
эргыс. Яныг хонт урыл
ханты эрыг вэрыс, та-
тем сымың, ялпың лат-
нытыл нётумтаме. Ам
«**Ас нэ**» ансамбли эргё-
гум, тованакт алям эрге
эргилум.

Ань потрумён та
оигпас. Галина Михай-
ловна нёмса элумхолас,
хотпа нупыл сымың
нэкве. Пус кат, пус лагыл
вос олы, сав пормас
катыл вос маштырлы,
маньлат махум вос
ханищты.

**Светлана
РОМБАНДЕЕВА**



Галина Михайловна атятэ вэрум
апа ванкрип суссылтытэ

МĀ-ВИТ ЫРГАЛАН ВĀРМАЛЬ

Мā-вит ўргалан рўпата урыл

Ты туй порат ляххал тотнэ
мāхум Сургут, Нижневартовск,
Лангепас, Нефтеюганск ўсытн мāшинал
тотыглавёсыт. Тонт ам ёс ялсум. Мāн тот
ййвыт ўнттысув. Тувыл нефтяникыт палт
ялсўв. Манырсыр рўпата тāн вāрэгыт,
тāнки мāнавн суссылтасыт ос потыртасыт.

Округувт мā-вōй винэ
мāт вāтихал кёртурыт
пāлыг-покматāлэгыт. Ты
хосыт мā-вōй ёл-сōсхаты,
мāтэ сака пāнктахты.
Ляпат ёлнэ ят ос тўрыт
витаныл лўолиг ёмтэгыт.

Тāн молях ул вос хар-
җайтавет ос пāлыг ул вос
поклэгыт, ань «Сургут-
нефтегаз» намба компā-
ния завод ўнттыс. Тот
вāрнэ турыт кйвраныл
ат харҗайтан кёрыл
вāравет.

Ты компаният мā-
вит ўргалан кўщай нэ
Любовь Малышкина
лāвме щирыл, 2025 тāl
мус пёс кёртурыт пус-
сын хот-пентавет. Ты
рўпата «Сургутнефтегаз»
намба компания 2013
тāl пāсныл элаль то-
тытэ. Тонт тāн йильпи
кёртурыт вāрнэ мāгыс
программа хассыт. Ты
хосыт округувт пёс турыт
пуссын лāщлакв тах
пентавет. Мōт хōн мāтт
хосат тāгыл тамле турыт

вāравет. Ты кёр сака хоса
вёриты.

Ань Сургут ўс ляпат
ёлнэ заводт рўпитан
мāхум ты хōтал мус кит
сōтыра китсāt сāвит
километра палыт йильпи
кёртур вāрсыт. Тāнаныл
акван-натнэ мāгыс нёл-
сāt сāвиткем щāнkv щё-
питасыт. Мōлты тāl сыс
нёлоловсāt арыгтем
километра палыт тамле
йильпи турыт пинвёсыт.

2014 тālныл ловинь-
таңкве ке, «Сургутнеф-
тегаз» намба компания
щар мāk сāv йильпи
кёртур округувт вāрсыт.
2019 тāl ойгпан мус тāн
ат сōтыра хўрумсāt па-
лыт километра йильпи
турыт пинункве ном-
сэгыт. Ты тēла щирыл
иҗ сāv рўпата вāрункве
эри.

Рўпитанёныл порат
сāv мā-вōй мā тармыл
сōсхаты. Ты мāт ань
нефтяникыт ёмщакв хот-
сыстамтыяныл. Тыи-



Л. Малышкина потырты

мāгыс тāн йильпи ищ-
хйпыҗ утыт ёвтсыт. Мāн
сōсхатам мā-вōй мāшинал
хот-виве. Пёс порат ты
пāнктым мāт сёил нас лап-
сōсантавес. Ань та мā нōх-
хилаве ос мōт мāн тотаве.

Нефтяникыт палт сāv
мāшина рўпитым яласы.
Ты хосыт сāv арыгтаптым
рещинаҗ шина хулыт.
Ты шинат наскāссыг ул
вос хуясыт, тāн заводн
тотавет. Кйвырт ёлнэ
кёртаныт тот хот-вивет,
шинат ос ищхйпыҗ утыл
мāниг яктавет.

Тувыл ты утыт асфальт
вāрнэ заводн кётавет.
Тот лёнх пиннэ ут палт
акван-тэлыгтавет. Ётыл
нйврамыт ёнгын қанытн,
қаснэ мāгыс щёпитым
қанытн ты рещинал
вāрим лёхьясыт пинавет.
Ты утыл лёнх вāрункве
сака ёмас. Тамле шинат
якытлан завод округувт
лов тāl рўпиты. Акв тāl

сыс тыитныл ат тонна
сāvсыр пормас вāрвес.

Ты «Сургутнефтегаз»
намба компания порсыт
акван-атнэ ос лāкква-
уртнэ завод ўнттыс. Тот
нэпакыт, кāпрон сульят
ос мōт порсыт мāниг
якытлавет ос матыр эрнэ
утыг вāрнэ мāгыс элаль
кётавет. Мōлты тāl сыс
тāн ниласāt арыгтем
сōтыра тонна нэпак ос
кāпрон тāстысыт.

2018 тāлт всероссий-
ский конкурс олум
порат «Сургутнефтегаз»
компания мā-витув
ёмщакв ўргаланэтэ
мāгыс янытлан нэпакыл
майвес. Тāн тиймāгыс
олн ат сāлитэгыт. Ювле
хулытум тāлт сātхуйплов
млрд. солкōви ты тēла
мāгыс холтсыт. Ты тāl
сыс атсāt млн. сāвит
солкōви тыгыл сāvнув
олн холтуңкве номсэгыт.

Николай МЕРОВ



АЛЫШЦЛАН ВАРМАЛЬ

Хул алышцлаңкве тув вовавет

Хонтаң районт лов арыгкем тал «Кама» намба община рупиты, кўцаиг тот Николай Сергеевич Андрейченко олы. Община хумус ань оln сэлэ, кўщай хум тох потыртас:

«Ман хул алышлым, пил ватым ос пакв, лахыс атым оln сэлэв. Ты тал пил сака ат тэлыс, мощца ватсүв. Лахыс сав олыс, махманув туп сат хотал сыс акв тонна савиткем атсыт. Ман тослым ос панкан варим лахыс тыналыянув.

Сорт, сымри, хюлум-хул, турхулыт Ханты-Мансийск үсн хул щёпитан комбинатн тотыянув, тот панкаг ос мот тэну-тыг варавет. Лахсың панкат ос тот варавет. Тэнутыт манки савсыр суссылтапыт оlnэ порат элал тыналыянув. Ты предприятие эт ман хосат тагыл рупитэв.

Общинат ань 20 элумхолас рупитэгыт. Туи порат тан хул алышлым яласэгыт, пил ватэгыт, лахыс,

паквыт атэгыт. Тэлы турбазан мүй махум хул алышцлаңкве, вораңкве тотыглэгыт. Кама, Алтай, Чантырья павлытт оlnэ 50 хотпа договор-нэпак щырыл рупитэв. Мань павылквет пил пир-майтан кол оныщев, павлың мир пил тына-лаңкве тув ос вермегыт.

2015 тал пасныл манки хул янмалтэв, ты рупата ос Ханты-Мансийскыт хулыт янмалтан колт рупитан махум аквёт варилүв. Мань сорхыт Тобольский хул янмалтан заводыт ёвтыянув. Тувыл мань хулыт Хонтаң районуын тотыянув ос хурум тўрытн тартыянув. Ты эрнэ тэла магсыл ань ос сав оln холтэв. Хуньт манки тартум сорханув юи-овыл талт ты тўрыт



Ищхыпң мат вим хуриг

пувиянув. Ман ты рупата элал воруңкве тах патылүв.

Ат тал сыс ман манки палтув мүй махум вовыглыянув. Ман Крестовый сор ос Светлый сор тўрыг ватат ўшлахтын мат вәрсүв. Мүй махум магсыл оlnэ колыт ос пувлын колыт ўнттысанүв. Екатеринбург, Тюмень, Курган, Пермь ос мот ўсыт оlnэ мүй хотпат тэлы машинал тув ёхталэгыт.

Ман ищхыпң утыт янас лопс оныщев, тот ўшлахтын мав урыл кинат ос савсыр послым хурит сунсуңкве рөви. Ань ты ищхыпң ут щырыл мүй махум манки палтув вовыглыянув.

Ўшлахтын ма ўнтты-мав ос сав оln холтсүв. Ты элы-палт грант-оln винэ магсыл нэпаканув кетыгласанүв ос оlnыл тастыгласев. Ты нёт-милыл Крестовый сор тўр ватат ман яныг

кол ўнттыслүв. Ос мүй хотпат хул алышцлаңкве тотыглан магсыл снего-ход ёвтсүв.

Тув миннэ ёмас лёңх атим, машинат яласан лёңх вәрыслув. Ань юи-овыл талыт сав махум Йильпи тал янытлаңкве тув ёхталэгыт. Тан сартын ман палтув свонитэгыт ос тот ўшлахтан магсыл оln тара ойтэгыт. Товат лов хотал оlnэгыт, хул алышцлэгыт, мотаныт тот нас ўшлахтэгыт. Ань мүй махум вовыгламав, оln мощ сэлуңкве патсүв».

Общинат рупитан хотпат касың тал Ханты-Мансийск үсн «Товары земли Югорской» намба суссылтапн вовыглавет. Тан хул, пил ос мот тэнутыт тот тыналэгыт ос ўсың мир Хонтаң районуын хул алыш-лаңкве ос ўшлахтуңкве вөвияныл.

Людмила ТЕТКИНА



Н. С. Андрейченко ағитэ эт

Руш нэ āпа юнтыс



С. Харитонова



Маштыр нэг потрамэг

Лүпта этпост Ханты-Мансийск үст āпа вәрнэ хаништап олум порат ам хурит катыл пōслын нэ эт потрамасум, наме Светлана Александровна Харитонова. Тав хурит пōслум ойка В.А. Игошев музей-колэт рупиты, нйврам галерея-колнак тармыл пуңкоты.

Овыл хōталытт нэ āпа юнтыс, тувыл катыл пōслуңке унтас. Светлана Александровна тох лāвыс:

– Музей-колт СССР народный художник Владимир Александрович Игошев пōслум хуриянэ акван-атим олэгыт. Тав мāныщи ос ханты мāхум хурияныл, олупсаныл катыл пōслыс. Тāн пормасаныл – āпаныл, тучаңаныл, аны-сāнаныл, та маныр, ос пуссын пōслыгласанэ.

Музейн шалтсан хōтпат сосса мир олнэ мāн ялуңке касыңаныл хунь вērми, тāн пормасыт катын виңке ос сунсыглаңке ат вермэгыт. Тот олнэ олтулыт катыл новуңке ат рōви. Таимāгыс ам

тыт ань āпа юнтэгум, музейн ёхталан мир таве катын вос вуйлыяныл, вос сунсыглыяныл, пūм-шалыяныл.

Апа вāруңке кұпнит хунь, мāхум тах вāңке патэгыт, хумус āпа щёпитаве, ты тэла сака рупатаң. Ты овыл āпам, овыл щёс юнтэгум. Иңыт āстласум кос, ань хансал щуртылум, хаништахтэгум. Хуриянум аман мұсхал щирыл вāриянум, ань вāнэ хōтпа китыглэгум.

– **Светлана Александровна, наң «Тōрум Маа» музейн вāтихал ёхта-лэгын?**

– Ты мāн ам ёмас номтыл ёхталэгум. Ысың хōтпатын тамле семинарытн ёхталаңке атхунь эри. Тыт та-

сāвит мāштыр мāхум атхатасыт, пуссын катыл щаквщуңке хāсэгыт. Акв хотты нэ манос хум ляпан рōвлахтэгын, пūмыщ матыр кāсал-эгын, мōт хōтпа палт минэгын, мōт матыр сунсэгын.

Тох лāшчал-лāшчал матыр-āti вāруңке хаништахтуңке рōви. Овыл хōтал ам сāsныл хусапсов вāрсум. Сās амти щёпитасум, йин-сум. Та юи-пал хōтал āпа вāруңке унтасум.

– **Наң хотыл олэгын?**

– Ам Забайкальский крайт самын патсум. Атям военный хōтпа олыс, колтāглув Россия янытыл сāv мāt олыс, сāv мāt яласасув. Художественный училище āстласум. Хурит катыл пōслум ойка В.А. Игошев мāнътāгыл сака эруптасум. Хунь иң хаништахтасум, таве Благовещенск үст вāслум, тот хуриянэ сус-сылтавёсыт.

Тōнтсуссум, тавнасати сосса мāхум пōслы. Олпанэмā-витхурипат, сака ат наңкхатэгыт, арген ат тотыгпиянэ. Ойка олтмёт лāвыглам, мāныщи ос ханты мāхум матыр-āti мā-витыл вуйлэгыт, тувыл ос аквтох пуссын ювле пиныяныл, арыг матыр ат выгыт.

Владимир Александрович 65 хуриянэ «Северный путь» вāрмаль щирыл пōслысанэ, тāнаныл овлэт Москва үст суссылтасанэ. Хунь Ханты-Мансийскын ёх-талас, 45 хуриянэ ўсың мирн муйлуптасанэ. Тōнт ты округ кұшайтн музей колыл унттуңке лāввес.

Ам ты ўсн нас кос муйлуңке ёхтысум, рўтанум лāвэгыт, тыт В.А. Игошев нампa музей олы, ам татем щāгтсум, тāра тув хайтсум. Тыт та олмыгтасум. Ань мирн вāнэ ойка музей-колт рўпитэгум, тōванакт ос пōслэгум.

Ты семинарт āпа вārнэ нэт хурияныл пōслуңке номылматсум. Ам ань ос Владимир Александрович хойлт сосса мāхум пōслым ўнлэгум, тāн ляльтаныл сунсэгум, номсащлахтэгум – маныр урыл номсэгыт, сыманылт матыр тārвит оныщэгыт манос ёмас номтыл ёмыгтэгыт.

Ань потрумён та оиг-пас. Светлана Александровна нила хури вāрыс. Лāвыс, хунь ном-тэ ат паты, пōслуңке щар ат вērми. Тыт тай татем щāгтым пōслыс, сома хотьютн нётвес.

**Светлана
РОМБАНДЕЕВА**



Ты хурит катыл пōслыс

ХАНИЩТАП

Ща́нь латңе ханищтан хум



А. И. Гашилов

Санкт-Петербург ўст А.И. Герцен намба университетт Лўимā мирыт институт колт налыман нупыл хōт тāl акв намың-суиң учёный хōтпа рўпиты, тав наме Аркадий Иванович Гашилов.

Ты хум хōтпа селькупыг олы. Ты мир ань о́с сака мощцаг ёмтыс, Россия янытыл туп нила сōтыра арыгтем хōтпа олы. Ща́нь латңаныл мощёртын о́с ты сōйми,

сака мощца хōтпа селькуп лātңыл потырты.

Аркадий Иванович такви мирён сака янытлаве, тав яныг учёный лāваве. Ты мир халт тамле учёный хōтпа воссыг āтим. Тав университетт рўпитанētэ сис сāv ханищтахтын нēпак хансыс. Ань Ямало-Ненецкий округт, Красноярский крайт ос Томский областт олнэ селькуп мāхум нйвраманыл школат танти лātңанылн ханищтаңкв вёрмияныл.

Хум Томский область Иготкино мāнь пāвылт самын патыс, щāнягēāщаге юн щāнь лātңыл потыртасыг. Пыг мāнь тагыл селькуп лātңыл

потыртаңкв хāсыс. Школа āстламе юи-пāлт педучилищат ханищтахтас, тувыл пāвлың мāн рўпитаңкв тётвес.

Мощ рўпитас, А.И. Герцен намба институтт ханищтахтункв минас. Тот сака ёмашакв ханищтахтас, таимāгыс лāввес, тав тот рўпитаңкв вос хульты ос наука тēла щирыл рўпитаңкв вос о́вылтахты.

Та пāсныл такви мāнь мире мāгыс тав сāv эрнэ рўпата вāрыс. Сака сāv научный нēпак хансыс, налымантем тāl нйврамыт ханищты. Ань сāvсыр тāлытт ханищтам хōтпанэ сāвың-пālэ пуссын школат рўпитēгыт, нйврамыт селькуп лātңыл потыртаңкв ханищтыяныл.

Мōтыт этпос 10 хōталēt ты ойка 71 тālэ тах тōвлы. Тав ань иң рўпиты. Яныг ўст олнэ

Лўимā мирыт институтт тав музей вāрыс. Тот кāсың мир урыл матыр пўмаш потырты, матыр суссылты. Мāн тот сака мāныщи пēs нēпакыт кāсаласанўв, тōват 1939 тāлт тāратымат. Кāсың мир маснутаныл тот о́с акван-атымат.

Рўпитан колнакēt Аркадий Иванович ялпың сām о́ныщи, тув шалтнэ мāхумн пōйк-щункве эри, такви урēтыл мощ потыртаңкв эри. Тамле ты пўмаш ос ёмас сымың учёный хōтпа А.И. Герцен намба университетт рўпиты.

Ты этпос 5 хōталēt Россия янытыл нйврамыт ханищтан мāхум янытлавēсыт. Мāн ты учёный хōтпа о́с янытлылўв, тав университет рўпитанētэ сис о́с сāv хōтпа ханищтас.

**Валентина
ВАСИЛЬЕВА**



Лўимā сēрипос

(Северная заря)
№19 (1205), 10.10.2019
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Врио директора –
Кондина Г.Р.
Телефон (3467) 33-22-72

Заместитель гл.редактора –
Кондина Г.Р.
Телефон (3467) 33-22-72

Ответственный секретарь –
Уэль В.В.
Телефон (3467) 33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы **04399, 54399**

Тираж **1710** экз.
Заказ **4269**
Цена свободная

Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.

Свидетельство
о регистрации
ПИ №ТУ 72-00795
от 23 января 2013 г.